



Broj: **01/2a-50-3-2-21/12**

Sarajevo: 22. 6. 2012.

## ZABILJEŠKA

### sa sastanka predsjedavajućeg Komisije za vanjske poslove Mirze Kušljugića s Ivanom Barbalićem, novoimenovanim ambasadorom BiH u Rusiji

Sastanak predsjedavajućeg Komisije za vanjske poslove Predstavničkog doma PSBiH Mirze Kušljugića s Ivanom Barbalićem, novoimenovanim ambasadorom BiH u Rusiji, održan je 21.6.2012.

**Mirza Kušljugić** pozdravio je Ivana Barbalića i istakao važnost Rusije sa aspekta međunarodnih političkih odnosa, aspekta energetike jer je Rusija značajno prisutna u regionu i mogućih drugih investicija koje bi se mogle realizirati u Bosni i Hercegovini. Spomenuo je važnost ekonomske diplomatije i trgovinsku razmjenu s Rusijom, koja bi se mogla povećati i u tom kontekstu naveo neiskorištenost ruskog tržišta.

**Ivan Barbalić** zahvalio se predsjedavajućem Komisije za vanjske poslove na prijemu kazavši da je imenovanje za ambasadora BiH u Rusiji novi izazov i da ima prostora da se pojača politička komunikacija. Istakao je problem s dugom koji BiH ima prema Rusiji a koji iznosi preko 100 miliona dolara, a koji se poklapa s klirinškim dugom Rusije prema bivšoj Jugoslaviji od kojeg se dio odnosi na BiH i dodao da će mu rješavanje tog problema biti jedan od prioriteta. Naveo je da postoji zainteresiranost da se to pitanje riješi ali i opasnost da ruska strana na kraju ove godine prestane biti kooperativna kao što je bila do sada. U tom kontekstu kazao je da klirinški dug prema bivšoj Jugoslaviji iznosi oko 140 miliona te da su sve zemlje bivše Jugoslavije dogovorile način izmirenja tog duga osim BiH. Što se tiče duga BiH prema Rusiji, kazao je da je bio u Energoinvestu koji je nosilac tog duga i da bi ovom dinamikom vraćanja on bio izmiren za 60 godina ali da postoji mogućnost da se sa intenziviranjem trgovinske razmjene taj dug vrati u kraćem roku. Ivan Barbalić je, uz ostalo, izdvojio mogućnost obrazovno-kulturne razmjene koja nije dovoljno prepoznata pogotovo u Federaciji BiH i u tom kontekstu naveo da se Povelja Kulina Bana nalazi u muzeju u Sankt Petersburgu te da će mu njeno vraćanje u BiH biti jedan od prioriteta.

**Mirza Kušljugić** kazao je da shvata da Ambasada sama nema kapacitet da pokrene sva bitna pitanja i u tom kontekstu izdvojio ulogu parlamentarne diplomatije. Naveo da je član delegacije PSBiH pri PSOSCE-a, gdje je primijetio da postoji jedinstven blok bivših zemalja Sovjetskog saveza kada je riječ o određenim temama, te da se na tim sastancima, gdje se delegacije često nalaze u istom hotelu, mogu pokrenuti neka pitanja. Dodao je da Komisija za vanjske poslove ima utvrđen fokus u ovoj i sljedećoj godini, te da se, pored regionalne saradnje i EU, izdvajaju još tri oblasti u kojima bi htjeli pomoći da se prodube diplomatski odnosi. Kazao je da je to Turska iz koje smo već imali posjetu delegacije na visokom nivou i imamo poziv za uzvratnu posjetu, Rusija i neke od zemalja bivših Sovjetskih Republika, Kazahstan i Azerbejdžan.

**Ivan Barbalić** kazao je da se Azerbejdžan pokriva iz Ambasade u Ankari a Kazahstan iz Ambasade u Moskvi. Dodao je još da Ambasada BiH u Moskvi pokriva Uzbekistan, Bjelorusiju, Armeniju i Kirgistan gdje ambasador ode jednom da preda akreditive i možda još

nekad. U tom kontekstu kazao je da s tim zemljama postoje sjajni odnosi u Vijeću sigurnosti u Njujorku.

**Mirza Kušljagić** kazao je da male diplomatije moraju koristiti sve moguće susrete gdje se određenim zemljama susrećemo tri puta godišnje kao što su skupštine OSCE-a i UN-a. Dodao je da je Komisija za vanjske poslove spremna da bude inicijalni kontakt ukoliko neka od bivših sovjetskih republika pokaže interes za svaki vid saradnje.

SEKRETAR KOMISIJE  
Merđana Iglica

Dostavljeno:

- članovima Komisije za vanjske poslove PDPSBiH
- članovima Komisije za vanjsku i trgovinsku politiku, carine, saobraćaj i komunikacije Doma naroda PSBiH
- Ministarstvu vanjskih poslova BiH
- a/a